

四庫全書

集部

欽定四庫全書

集部  
傅家集卷四至六

詳校官庶吉士<sub>臣</sub>李如筠

檢討<sub>臣</sub>何思鈞覆勘

總校官庶吉士<sub>臣</sub>倉聖脉

校對官監丞<sub>臣</sub>張魯炳

謄錄監生<sub>臣</sub>陳燦

欽定四庫全書

傳家集卷四

宋 司馬光 撰

古詩三

都下秋懷呈聶之美

愚疎強從仕趣尚與時乖  
竭來遊京邑榮願知誰諧  
王國富英竒氣象標巖崖  
雲鴻送雙目攀援路可階  
秋風轉枯葉颯颯繞寒齋  
出門無所之飛塵滿天街  
夫君宦未達猶得稱吾儕  
解衣換斗酒且盡平生懷

陪張龍圖南湖暑飲

六言

紅旆紫林却轉瓊筵就水重開荷香著衣不去竹色映  
酒遙來

樓船激灩輕浪鷗鷺繽紛滿天清歌久之未度畫梁塵  
落芳筵

道傍田家

道傍田家翁媪俱垂白敗屋蕭條無壯息翁攜鋤索媪  
攜箕自向薄田收黍稷靜夜偷舂避債家比明門外已

如麻筋疲力敝不入腹未議縣官租稅促

送李汝臣同年謫官導江主簿

得喪互循環古今昧終始百歲落其間僅與毫芒似所以達人心身外不復紀愁來若亂絲䟽解當以理昔君關外來籍籍聲華起憑案一濡毫萬言俱落紙老生闕其文色若寒灰死閣筆不能下敢有疵瑕指或時抵卿相入門俱倒屣閣夫迎受謁不敢揚眸視解褐吏遣州長塗初進跬蛟龍得尺水雙骼方疑疑西羌負德澤飛

鎬聳邊鄙添兵十萬餘斗粟無支擬州郡走符檄縱橫  
恣鞭箠閭閻浪愁苦卒食半糠粃上官知君才悉以儲  
糧委開倉募平糴至者車連軌嚴明束吏手誘諭提民  
耳留穀受金去若與同儕市弦朔未云周露積丘山比  
曾無轉餉勞坐飽防秋士幕府上其功明詔深嘉美為  
僚登九寺長人專百里聊用報勤劬未言窮任使何期  
逢怨讎意外成瘡痂刺骨舞文法吹毛出瑕滓清霜五  
月飛慘烈傷蘭芷鸞鳳失椅梧飄泊還荆枳聖朝方任

能大過尚收齒况於濟時具慙然遭詆訾寧因青蠅惡  
遂取瓊璫毀良工構明堂必不遺杞梓勉哉益自立勿  
為窮衰止人生難豫期神理無終否庸知今日憂不為  
後日喜吾道誠無虧壞坎安足恥闕山迤邐長百劍連  
天倚縈紆結危棧迥入雲星裏蜀國富嬉遊花繁春酒  
旨莫作弔原文投之岷江水

春日書寄東郡諸同舍

滑臺古鎮揭高牙主人賢厚賓友嘉公庭退休射堂飲

水沈綠李浮甘瓜清言妙諭間詼謔笑語往反何喧譁  
別來汎濫若浮梗塵愁俗累稠於麻提鞭俄益觸風日  
慘溢滿眼飛埃沙朱門湛湛果深淺門外日擁千餘車  
閤人未肯即通刺指彈手版景欲斜就令入見亦何事  
氣象渺邈凌青霞圍碁角智賭勝負拙者理與功名賒  
捨之歸入戶庭隘仰視青天如井蛙後檐數尺地荒穢  
不翦欲令生薺花當春寂寂但如此意恐至外逢紛華  
奈何勝友百餘里不可一見如天涯何時更共把卮酒



側身北望空咨嗟

秋日寄山中友人

昨夜聽秋風  
霜崖幾樹紅  
心隨新鴈去  
宛至碧谿東  
聖主搜漁釣  
林巖今已空  
胡為執高節  
憔悴久山中

和之美舟行雜詩八首

舟中夜坐二首

風柳動蕭疎  
寒星浸寥落  
中宵四寂然  
時有遊魚躍  
汀沙落席帆  
岸柳縈單舸  
小市遠微茫  
簇水初燈火

船行遇風

蔡水僅成波不若江湖濬誠無傾側憂纜弱終難進

野花

喧喧桃李蹊何妨笑幽草但願保天真徐共春風老

水鴨

襍襍出短蒲毳毳浴清水物忌太鮮明何妨染泥滓

魚鷹

翩然下林表不憚風湍惡得雋輒高飛為君羞擊搏

罾魚者

弱篠絳輕絲盡日寒溪側獲少近知無溪魚皆爾識

都門路

紅塵晝夜飛車馬古今迹獨憐道傍柳慘淡少顏色

和之美河洲四詩

冉冉河洲曉晴霞登木杪稍見水煙開孤舟天際小  
杳杳河洲晚客行殊未返目隨林鳥還心共征鴻遠  
寂寂河洲夜蘆花繞墟舍孤客久未眠窓燈落寒地

漠漠河洲雨依稀辨村聚時哉鷗鳥羣凌亂爭鳴舞

又和夜雨宿村舍

積雨久未闕豈徒行客憂夜聞屋中人歎息悲田疇方  
春播殖時種食皆外求鞭訶犯赤日酷烈慙羸牛草蕝  
競禾長從人借鋤耰晨媻戴星起日闇未能休豈無一  
時勤所覲歲有秋今茲昏墊災大埜成洪流直疑滄海  
溢繭粟浮陵丘昔時百丈原汎汎皆挈舟喬木失端杪  
飢鳥下無投黍稷沉黃泥圭合安可收嗟予乏技能無

以易糠粃販鬻固所昧敢託市井遊欲依盜賊羣懦不  
閑戈矛已哉任天地無益徒為愁一身無死所況為妻  
兒謀之美愛物者淒然涕霑裘一夫有不獲伊尹為深  
羞何當富斯民比屋困倉稠惜哉祿秩卑此志終宜酬

送韓太祝維歸許昌賦得交字

王城名利窟冠蓋鬱相交夫君獨鳳舉影然去喧呶頽  
水清可濯箕山高可巢反顧公相榮一芥浮堂坳逸二

大呂重豈知輕斗筭蒼蒼氣象嚴萬木擁寒郊逸二點

金人元好問詩集卷四  
隈曲初旭染林梢去去善自將因聲訪衡茅

和興宗夜直聽雨

逸一字  
茫凍雨來入夜勢增急縱橫挾春風飄灑相噴吸敗

窻端見欺遽有萬點入先生伏經編眼冷倍昏澁夜分  
童僕倦跛倚厭久立燈火為溟濛詩書亦霑濕夫君儲  
善價未售不悒悒物華迎霽新佳賞時將及困中秣幾  
何營釀須汲汲

花庵詩寄邵堯夫

時任西京留臺解舍東新開小園無亭榭乃構木挿竹多

種醅醲寶相及牽牛扁豆諸蔓延之物使蒙  
累其上如棟宇之狀以為遊涉休息之所名

曰花  
庵

洛陽四時常有花雨晴顏色秋更好誰能相與共此樂  
坐對年華不知老

自然天物勝人為萬葉無風綠四垂猶恨簪紳未離俗  
荷衣蕙帶始相宜

康定中予過洛橋南得詩兩句於今三十二年  
矣再過其處足成一章

金人卷之三  
卷四  
銅駝陌上桃花紅洛陽無處無春風重來羞見水中影  
鬢毛蕭颯如秋蓬

寶鑑貽開叔

流塵集寶鑑塵昏鑑不昏  
纖泥落清水泥渾非水渾  
人能辨二物相與自忘言  
二物不能辨悠悠何足論  
無為捨其內逐外取煩寃

謝王道濟惠古詩古石器

緱氏古城裏好古王道濟  
作詩有古風讀書知古意  
朝



來遣僕夫遺我古石器結從天地初生自一拳際工倕  
創規摹般輪施剖劂淪茗北窓下坐有羲皇思嗟予性  
迂鄙齟齬居今世忝官污臺省曾無益時智退藏又濡  
滯尚不離朝市闕地避煩暑頗與營窟類新構西齋中  
鑿地為室謂  
之涼洞誠非古人比拜賜得無愧

題太原通判楊郎中希元新買水北園

洛陽名園不勝紀門巷相連如櫛齒修竹長楊深徑迂  
令人邑邑氣不舒愛君買園中橋北堂壓崖端跨空碧

滿川桃李皆目前近水遠山一朝得曾陪尊兄此高會  
豁然如出樊籠外慙遊尚爾況久居勝氣清風日相對  
易生畫筆世所珍麀猿滿壁皆逼真并州近胡沙塵惡  
終更早來為主人

首夏呈諸鄰二章

首夏木陰薄清和自一時筍抽八九尺荷生三四枝新  
服栽蟬翼舊扇拂蛛絲莎徑熱未劇晨昏往來宜  
熾燼久旱天颯颯昨宵雨塵頭清過轍水脉生新渚豈

徒滋杞菊亦可望禾黍勿笑盤蔬陋時來一觴舉

酬王安之謝藥栽二章

洛人栽花不栽藥吾屬好尚何其偏服之雖能已百疾  
愛閒成僻無由痊

護根帶土我親移荷挿汲泉君自種悅目寧將惡草殊  
扶危或比蕪金重

雨中過王安石之所居不謂以詩寄之

萬木含涼雨驅馬有餘清長街帶短蕪舊潦駢新萍高

齋彼誰居雅尚推名卿汗亭雖地卑躡屐未妨行野服  
踞藜牀蕭散臨前楹纂纂叢林繁欣欣藥畹榮過門不

敢叩自視慙冠纓

素與安之約不以公服相過

送藥栽與王安之

盛夏移藥栽及雨方可種為君著屐取呼童執傘送到  
時雲已開枝軟葉猶重夕陽宜屢澆又須煩抱甕

張明叔兄弟雨中見過弄水軒投壺賭酒薄暮  
而散詰朝以詩謝之

喜君午際來涼雨正紛泊呼奴掃南軒壺席謹量度軒

前紅薇開壺下鳴泉落

虎爪泉上覆之以板每投壺板上設榻繞之榻去壺各二矢半

必爭如五射有禮異六博求全怯垂成倒置畏反躍

新格

倒中者壺中之筭盡廢之

雖無百驍巧且有一笑樂交飛觥酒滿強

進盤餐薄苟非興趣同珍般徒綺錯

### 小雨

雲日互出沒數朝飛雨清瞳矐似欲止廉纖還未晴映  
空輕絲亂著物細珠明葉端危未落荷心重忽傾喜涼

高驚舞便濕羣蛙鳴於子亦有得藥畹胡麻生

園中書事二絕

芳洲晚日鮮曲岸新雨好紅薇點圓荷金盞出幽草  
坐嗅白蓮蕊卧看青竹枝閒齋不成寐起讀聖俞詩

送劉仲通知涇州

四載一相逢相逢遽為別儕輩日蕭條與君俱白髮  
酒不暇執舊遊那復說忽忽無他言暑行戒飢渴

和宋復古大雨

積陰連日作鬱蒸長雲飛天勢如鵬白雨四注垂萬絙  
坐間斗寒衣可增

雷公推車電施鞭飛騰九澤舞百川須臾開晴萬物鮮  
仰視白日當青天

見山臺晝卧偶成

移牀獨上高臺卧颯颯涼風吹面過林蟬忽噪驚薄夢  
手執殘書幅巾墮

修醮醮架

貧家不辦構堅木縛竹立架擊醅醲風搖雨漬不耐久  
未及三載俱離披往來遂復廢此徑舉頭礙冠行絳衣  
呼奴改作豈得已抽新換故拆四籬來春席地還可飲  
日色不到香風吹

螢

林塘荒濕地向夕已飛螢月沒蛩吟砌露涼人在庭隨  
風疑落燼過水亂踈星學子燈前寢誰將爾照經

張明叔家瑞蓮



君家得蓮種遠自浙江湄  
明燭然深盃濃朱畫細絲  
盛開尤菡萏到落不離披  
豈獨夏花好仍兼秋實奇  
味長包石蜜殼嫩剥燕脂  
況復芬芳久霜前殊未衰

蓮房

蓮房前後熟供噉不須齊  
肉嫩山蜂子稜深天馬蹄  
尚連餘蘂在深映亂荷低  
脆美知新采近根猶帶泥

不寐

長年睡益少氣耗非神清  
昨朝多啜茶況以思慮并  
中

煩枕屢移展轉何時明  
蘇秦六國印力取鴻毛輕  
白圭萬金產運智立可營  
如何五更夢百方終不成

苦雨

今春憂亢陽引領望雲族  
首夏忽滂沱意為蒼生福  
自爾無虛日高原亦霑足  
連年困饑饉此際庶和熟  
如何涉秋序沈陰仍慘黷  
長簷瀉潺湲晝夜浩相續  
喧飀流潦怒突兀壞垣禿  
駕牛泥沒鼻跨馬水平腹  
瓦歌松漫白道廢草濃綠  
汙萊閔下田漏濕憐破屋  
縱橫委地麻

狼籍卧隴穀怯聞飢嬰啼愁聽寡婦哭閒官雖無責飽  
食愧有祿世紛久去心物役奈經目鬱陶聊秉筆狂簡  
已盈幅

八月十五日夜宿南園懷王君貺

昔公在洛師未嘗棄嘉節今宵秋半分空羨西園月天  
色湛澄清風聲冷騷屑笑言不可親引領望金闕賴有  
篋中詩端居數披閱

八月十六日過天街懷范景仁

秋潦收四野晴雲無一斑忽驚龍門缺遠見鳴臯山涼  
颺入毛髮顛氣清心顏悠然念吾友逍遙城闕間思陪  
藍輿尾共此登臨閒

宿南園

頃來興味少旬日不為詩昏昏但思眠疲病知吾衰豈  
無籬邊菊不欲拈酒卮絡緯爾何苦終夕鳴聲悲

九月十一日夜雨宿南園韓秉國寄酒兼見招

以詩謝之

雨多秋草盛濃綠擁寒階吾廬奧且曲退縮如晴蝸小

園已自隘欲往泥霑鞋體羸畏風冷室處門常闔空媧切

九日古所重負此時節佳緬想使君宴綺席臨高齋肥

豨堆玉盤飛觴酒如淮楚舞陵湖波茱萸落金釵神醒

鼓吹喧百疊疑傾崖歡餘忽我思牙兵星火差溟泉恥

獨醉醇味相與偕我飲雖不多和氣浩無涯梧子拾為

果拒霜伐為柴沼中數寸魚烹煎足為鮭吳人謂魚肉為鮭誰

言無以侑繞渚多鳴蛙交道久衰薄歸然見吾儕奈何

數舍遙晤語積年乖況乃辱嘉招私心豈不懷輾轅石  
道澁重以陰雲埋雖有果下馬款段非渥洼臨風徒竦  
踊志願焉能諧狂詩寄一笑聊用當詼俳

古墳

茫茫野田平極目歷歷古墳如夏屋碑板無文荆棘深  
石獸沈淪松栢禿問人雖不知姓名昔皆高官仍厚祿  
子孫流落何所之凶吉當年非不卜我來正值寒食天  
祭膳不設無人哭

酬趙少卿兩字南正藥園見贈

鄙性苦迂僻有園名獨樂滿城爭種花  
治地惟種藥栽培親荷鍾購買屢傾  
索縱橫百餘區所識恨不博身病  
尚未攻何論療民瘼

登封龐國博元常字懋德年三十八自云欲棄官隱

嵩山作吏隱庵於縣寺俾光賦詩勉率塞命  
懋德負長才全牛不足剗纔為百里宰驥足殊未展齒  
髮方盛彊趣尚已高遠結庵賦二室志欲巢絕巘賢人

心如雲無迹有舒卷不須驚俗目卓犖乃求顯既知吏  
可隱何必遺軒冕

暮春同劉伯壽史誠之飲宋叔達園

絮狂飛作團梅小不多酸共惜春餘好更窮今日歡清  
流入花底翠嶺出林端嫩筍玉縈筋新櫻珠照盤邀迎  
嘉客易會合故人難寄語門前僕驂駟任解鞍

用前韻再呈

舊友今餘幾追思鼻可酸休論身外事且盡目前歡薛



荔垂隄面醪醲擁席端舞精抽繭緒絃妙落珠盤醇酒  
回春易靈丹却老難扶歸不復記醪酲上金鞍

示道人

天覆地載如洪鑪萬物死生同一塗其中松柏與龜鶴  
得年稍久終摧枯借令真有蓬萊山未免亦居天地間君  
不見太上老君頭似雪世人浪說駐童顏

謝王君貺中秋見招不及赴

不侍庾公宴月華虛四秋幸逢東閣開又阻西園遊清

輝散廣坐孤影隨行翰袞衣如未歸志願終可酬

久雨效樂天體

雨多雖可厭氣涼還可喜欲語口慵開無眠身懶起一榻有餘寬一飯有餘美想彼廟堂人正應憂燮理

聞范景仁遷居許昌為詩寄之

天衢名利場塵泥繼朝昏況茲辭榮久厭苦車馬喧慨然忽高舉翩若黃鵠翻朝賣西城宅暮理南行轅回首豈無懷眷眷望國門想象解裝初完美未可論縱橫置

老屋缺剝周垣臧獲念去故炊爨假覓盆幼穉喜就  
新階庭走諸孫幸有克家子生事不日溫許昌昔名都  
於今亦雄藩先賢雖已遠風迹凜猶存况復多巨公分  
義素所敦丞相辭黃閣學士乘朱轡青雲同禁省白首  
會山樊溟水湛寒光盡眼清心魂華堂臨曲渚畫舫承  
芳樽高談金石諧逸筆風雨奔得朋誠多歡孤陋未可  
諛時當惠好音獨樂慰荒園

送張伯常同年移居郢州

楚江白逶迤楚山碧參差玉炊稻粒長縷切魚腴肥羨  
君盡室行飄然無所羈伐竹營茅茨種橘為藩籬荒坡  
無四垣但以荷塘圍官雖朝大夫身世已相遺野老坐  
爭席林叟談忘歸猶嫌沮溺徒名字為人知

南園飲罷留宿詰朝呈鮮于子駿范堯夫彛叟  
園僻青春深衣寒積雨闕中宵酒力散卧對滿窓月  
觀萬象寂遠聽羣動絕只疑玉壺冰未足比明潔

自用前韻

耿耿寐不成，迢迢夜未闌。良朋悔不留，負此當軒月。懷  
想空鬱陶，眺聽轉清絕。佗時重見過，餘樽猶可潔。

不寐

思夢久不效，良夜行已闌。心如杯水擾，易澄苦難百。  
年能幾何萬慮誰能殫，棄置勿復尋。專取形神安。

招鮮于子駿范堯夫

虛牖延朝光，高林散晴靄。深夏猶清和，閒齋亦爽塏。離  
羣纒宿昔，跂佇心已痲。楸枰頗光潔，置設儼相待。軒車

能竭來雞黍足充餒

和家兄喜晴用王安之韻

象龍雖得請躍蜈亦須占既有膏苗益寧無漂麥嫌餘  
霏方映戶反照忽通簾羈旅愁懷閱農家喜色添田間  
拾穗滿陌上荷鋤兼預想三川迥秋場萬庾尖

病中鮮于子駿見招不往兼呈楚正叔范堯夫

時正叔約  
次日為會

良朽拙自將蘊積成中病掩扉卧小榻安養惟便靜遙

知良友集鬱若荀陳盛獻醜屏浮飾簡率任真性雖無  
束帶苦實憚把酒併開囊檢藥物不與樽壘稱筋骸幸  
復常佗時掃三徑

和鮮于子駿秋意

好風自遠來小雨初濡地雖當朱夏半已有清秋意新  
蟬乍孤吟病葉或先墜頓覺愈沉疴慙喜濯炎熾彩筆  
動高興瑤徽發幽思賤子獨何為宵涼甘熟寐

龍門

石樓臨晴空南眺出千里人憐山氣佳予歎禹功美想  
彼未鑿時極目皆洪水誰知耕桑民幸免魴與鯉

坐中呈鮮于子駿范堯夫

六言

微雨雖妨行樂薄寒却解留花今日且遊小圃明朝更  
向誰家

和范景仁緱氏別後見寄求決樂議雖用其韻  
而不依次蓋以景仁才力高逸步驟絕羣非  
駑拙所能追故也



至樂存要眇失易求之難昔從周道衰疇人曠其官聲  
律久無師文字多缺漫仁皇閔崩壞廣庭集危冠紛紜  
鬪筆舌異論誰能殫或欲徇陳迹竅厚潛鏖剗或欲立  
私意妄取舊史刊古今互齟齬大抵皆欺調景仁信其  
說墨守不可干賤子欲面從誰與換膽肝必求此議決  
深谷為崇巒何如兩置之試就中和看天地育萬物生  
成適暄寒聖人保四海皇極致阜安樂理亦如此炳煥  
猶朱丹擘緩與噍殺折衷遺兩端茲道苟不由芒屨難

嬰翫魯樂最為備雍徹施三桓齊韶猶肆習太公避陳  
完唐民聽伴侶不復含悲酸乃知樂有源鐘鼓皆波瀾  
昨者清明初榆火始改鑽景仁從許來傾都咸聚觀諸  
公競邀迓非獨惜春殘議樂不復對晝夕且窮歡來時  
桃李穠去日芍藥闌三旬只須更駛若阪上丸轆轤逢  
雨別恟怳歸騎單東西步步遠回首祝加餐仍冀勉中  
和心廣體自胖

和韓秉國招范景仁飲景仁不至云方作書與

光論樂

小桃佳李實如拳西湖盡眼鋪芳蓮景仁不從鄉賢飲  
為此樂論方窮研周衰官失疇人散鐘律要眇誰能傳  
近人欺衆出私意最可閔笑房生顛如光初不辨宮羽  
是非得失安敢專每煩教諭累百紙頑如鐵石不可鑄  
王李阮胡相詆毀各執所學何妨偏景仁家居鑄黼斛  
欲除民瘼恐未然要須中和育萬物始見大樂之功全  
同鮮于子駿題和樂亭

春禽弄晴朝秋蟲吟雨夕風和振蘭芳露寒滋菊色萬  
物苟得所隨時各有適矧伊人最靈胡為長感感聖人  
垂大訓燦爛著方冊至樂和無聲大禮簡無跡心專守  
中庸身不蹈邪僻造次常在前須臾不離側窮通雖百  
變何往不自得茲亭聊寓名和樂在胸臆

王君貺宣徽垂示嵩山祈雪詩十章合為一篇  
以醅之

今秋少雨冬不雪麥寄浮埃根欲絕聖主焦心閔萬民

負宸不怡常膳撤詔書朝下徧九州岳瀆百神俱禱求  
西都留守虔君命促駕不敢須臾留嵩高萬仞蟠地中  
海內衆山無與雄前驅大旆擁千騎波騰雲涌來祠宮  
牲肥酒香籩豆潔盛服齋明薦毛血有司執事皆肅然  
寶帳神來風窳屑公心猶畏九閻遙丹誠不能通青霄  
分留導從屯林麓別張醮具登山椒山椒迢遼峻無極  
行挽枯藤躡危石萬室嗷嗷愁死飢敢憚劬勞愛餘力  
天門上出俄坦平下視一世塵杳冥焚香拜手傾懇惻

左右前後皆列星公今三守三川地咫尺高高未嘗至  
詰朝既畢祠事嚴暫轉鳴珂歷諸寺少林昔為達摩居  
達摩英靈今有無瘦辭流散滿天下競以兩手捫空虛  
法王魏氏離宮舊玉刻狻猊猶有子孫宗廟皆塵灰  
止見伽藍存不朽會善庭隅千歲松一根二股凌寒空  
勢如鼎足爭秀出泠泠永夜吟霜風少室先生樂閒暇  
棄官來家玉峯下昔為浪泊據鞍人今結東陵賣瓜舍  
溪上有堂名掛冠四垣重複皆林巒呼兒掃地喜公到

隨分絃歌留盡歡周王太子名聞久相傳羽化緱山首  
鶴飛笙遠宵無迹遺廟今人空漑酒公來本不事遨嬉  
周流閭里詢疲羸親呼令長囑赤子勿貪榮利窮鞭笞  
境中羣望無不走回轡仍過鑿龍口奉先暮投林日曛  
浥澗晨征轍冰厚歸來新詩盈一編明珠大貝相屬聯  
此行雖不從公後歷歷勝遊皆目前

酬吳仲庶龍圖終南山詩

泰山魯所瞻終南乃秦望西侵并絡閣北壓鶉野曠條

梅韞名材金玉富珍藏飄風何烈烈萬物盡搖蕩屹立  
不傾倚勢與厚坤壯有如牧伯賢斯民蒙保障雪霜舉  
世寒千里獨重纒病夫伏閭里非能事微尚顧無孤高  
實藻飾安可強景行雖不忘詎敢承嘉貺

酬永樂劉祕校庚四洞詩

貧居苦湫隘無術逃炎曦穿地作幽室頗與朱夏宜寬  
者容一席狹者分三支芳草植中唐嘉卉周四垂詎堪  
接賓宴適足供兒嬉自問安取法前脩果慕誰非如太



古民營窟避寒威又非學射人空石專致思又非沮漆  
俗陶復習西夷又非楚司馬金秦相賓儀又非鄭伯有  
壑谷甘糟醕又非越王子丹穴免憂危又非張巨和崇  
巖立師資所慕於陵子欲效蚓所為微竅足藏身槁壤  
足充飢養生既無憾此外安敢知唯祈膏澤布歌嘯樂  
餘滋豈羞泥塗賤甘受高明嗤何言清尚士善頌形聲  
詩困剝固未嘗井復敢終辭

傅家集卷四

欽定四庫全書

傳家集卷五

宋 司馬光 撰

古詩四

瞻彼南山詩

瞻彼南山有栎有棠維葉牂牂君子之燕籩豆洋洋鼎  
俎將將百羞阜昌上下樂康邦家之光君子萬年撫有  
四荒受祿無疆瞻彼南山有楛有栩維葉滑滑君子之  
燕清酒有藇壺樽有楚酌言賜之命之醕之上下以序

君子萬年永綏兆民受天之祐瞻彼南山有杞有樞維  
葉逢逢君子之燕管絲囀囀奏鼓鼗鼗自堂徂庭上下  
肅雍靡有不恭君子萬年令德高明高明有融赫赫明  
明天命有嚴命我祖考九土是監倭駟之東蠻蜚之南  
享獻允時靡敢不詹闕茲餘文複閣巖巖萬世是承四  
方是瞻帝曰卿士左右之臣四方無虞矜爾之勤式觀  
且遊從予一人于壺于闕于堂于陳金石之符翰墨之  
珍匪予汝夸祖考之勲多士庶尹羣公百辟拜手稽首

答揚休德既醉既飽慎思爾職罔顧爾私罔愛爾力悖  
忠祇救永奉丕則立民之極載祀千億

扶柏寄傅欽之

彼扶者柏生于崇巖其葉九九君子爰處爰處爰遊匪  
憂勿憂其樂休休彼郁者蘭生於幽涯其葉菲菲君子  
爰處爰處爰嬉靡遑弗宜忘其渴飢洋洋者舟汎彼中  
流于渚于洲思其可思知其可知其逝勿追其來勿期

園櫻

園櫻傷老也

園有繁櫻圃有肥菁我酒旣清我殽旣馨我友戾止聊以娛情今我不樂日月其征

園有穠李圃有肥杞我酒旣旨我殽旣美我友戾止改憂為喜今我不樂年其有幾

園有弱柳圃有肥韭我酒旣有我殽旣阜載笑載歌以宴我友今我不樂年其無久

悠悠汎舟載縱載橫白日將傾飄風載驚嗟我老矣髮

脫齒零胡為百憂勞此餘生

戲下歌

項王初破函關兵氣壓山河風火明旌旗金鼓四十萬  
夜泊鴻門期曉戰關東席卷五諸侯沛公君臣相視愁  
幸因項伯謝前過進謁不敢須臾留椎牛高會召諸將  
寶劍泠泠舞席上咸陽灰燼義帝遷分裂九州如指掌  
功高意滿思東歸韓生受誅不復疑區區蜀漢遷謫地  
縱使倒戈何足為

海仙歌

東望海波蒼茫浩渺無所極高浪洪濤黯風色翻星倒  
漢天地黑陰靈出沒互相索東方曠曠景氣清慶雲合  
杳吐赤精蓬萊瀛洲杳如萍遙觀五樓十二城羣仙劍  
佩朝玉京祥風縹渺鈞天聲彩幢翠蓋煙霞生鸞歌鳳  
舞入帝鄉紫麟徐驅白鶴翔餐芝茹木飲玉漿千年萬  
年樂未央

孟嘗君歌



君不見薛公在齊當路時三千豪士相追隨  
邑封萬戶無自入椎牛醢酒不為賢門下紛紛如市人  
雞鳴狗盜亦同塵一朝失勢賓客落唯有馮驩西入秦

燕臺歌

萬古蒼茫空盛衰燕臺賢客姓名誰  
君看碣石嵒中草寧似昭王擁篲時  
黃金散盡基沒易水蕭條烽火飛  
吳沖卿直舍閣士安畫墨竹歌

閣生畫竹舊所聞望中一見遙可分  
伊予不甚曉佳畫

猶愛氣骨高出羣狂枝怒葉凌絹素勢若飛動爭紛紜  
蟠根數節出地底上有積年蒼蘚紋森然直幹忽孤聳  
意恐出屋排浮雲秋風颯颯生左右耳目灑落遺塵氛  
乃知良工自神解昧者倣習徒艱勤子猷昔者得收玩  
不患終朝無此君

送伊闕王大夫歌

于嗟古之道邈既遠今日陵夷而就衰羣儒角逐異端  
競進兮聖塗榛枳幽昧而難知君獨恥從衆人之後兮

軒然高舉遠取而窮追撥去虹蜺汎掃氛濁兮廓然迺  
得睹夫朝曦授邑於雒之南兮始者既學今得而施歸  
風俗於醇厚兮又何西門卓魯之足為消奸化桀折牙  
杜蘅兮寂不知其所之何者為令之德兮黃童皓首接  
手而遊嬉菽粟露積牛羊被埜兮百里獨比於太古之  
時子願解冠棄佩兮受一廛於伊之埜蓑身笠首兮同  
邑民以熙熙

和錢君倚日本刀歌

昆吾道遠不復通世傳切玉誰能窮寶刀近出日本國  
越賈得之滄海東魚皮裝貼香木鞘黃白間雜鍮與銅

賈人云真鍮似金真銅似銀

似百金傳入好事手佩服可以攘祆凶傳

聞其國居大島土壤沃饒風俗好其先徐福詐秦民采  
藥淹留童叟老百工五種與之俱至今器用皆精巧前  
朝貢獻屢往來士人往往工辭藻徐福行時書未焚逸  
書百篇今尚存令嚴不許傳中國舉世無人識古文嗟  
子乘桴欲往學滄波浩蕩無通津令人感嘆坐流涕鏞

濫短刀何足云

風林石歌

蔡著作抗字子直  
得此石於朱陽山

聞君家有風林石鐫刻無痕畫無迹靡然合勢俱左傾  
偃蹇常如負風力置之坐側野意生靜聽若有颼颼聲  
忽疑身世在丘壑使我蕭然無俗情黃金白壁豈非好  
子直視之不為寶

天馬歌

大宛汗血古共知青海龍種骨更奇網絲舊畫昔嘗見

不意人間今見之銀鞍玉鐙黃金轡廣路長鳴增意氣  
富平公子韓王孫求買傾家不知貴芙蓉高闕北向開  
金印紫綬從天來路人回首無所見流風瞥過驚浮埃  
如何棄置歸阜棧踈足垂頭困羈絆精神慘澹筋骨羸  
舉目雙睛猶璀璨伏波馬式今已無子阿肉腐骨久枯  
舉世無人相騏驎憔悴不與駑駘殊神兵淬礪精芒在  
寶鑑遊塵肯終晦君今鬢別被鳴驚尚能騰踏崑崙外

苦寒行

窮冬北上太行嶺霰雪糾結風凜嶢熊潛豹伏飛鳥絕  
一逕僅可通人行僮飢馬羸石磴滑戰慄流汗皆成冰  
妻愁兒號強相逐萬險歷盡方到并并州從來號慘烈  
今日乃信非虛名陰煙苦霧朝不散旭日不復能精明  
跨鞍纜轡趨上府髮拳鬚磔指欲零炭爐炙硯湯涉筆  
重複畫字終難成誰言醇醪能獨立壺腹迸裂無由傾  
石脂裝火近不熱蓬勃氣入頭顱腥仰慙鴻鴈得自適  
隨陽南去何溟溟又慙馭鳥識時節巖穴足以潛微形

我來蓋欲報恩分，契闊非徇利與榮。古人有為知己死，  
只恐凍骨埋邊庭。中朝故人豈念我，重裘厚履飄華纓。  
傳聞此北更寒極，不知彼民何以生。

楚宮行

楚王宮中夜未央，清歌祕舞會華堂。木蘭為柱桂為梁，  
隨珠和璧爛同光。橫吹乍鳴秋竹裂，繁絃初度春雨歇。  
九微火樹垂垂滅，羅衣紛紛玉纓絕。滿朝冠劍東方明，  
宮門未啓君朝醒。秦關日夜出奇兵，武安君火照夷陵。



洛陽少年行

銅駝陌上桃花紅  
洛陽無處無春風  
青絲尾結連錢驄  
相從射獵北邙東  
流鞭縱鎬未云畢  
青山團團載紅日  
雲分電散無影迹  
黃雞未鳴已復出

將軍行

赤光滿面脣激朱  
虬鬚虎額三十餘  
腰垂金印結紫綬  
諸將不敢過庭除  
羽林精卒二十萬  
注聽鉦鼓觀麾旗  
肥牛百頭酒萬石  
爛漫一日供歡娛  
自言不喜讀兵法

金...  
卷五  
智略何必求孫吳賀蘭山前烽火滿誰令小虜驕慢延  
須臾

緱山引

王子吹笙去不還當時舊物唯緱山山深樹老藏遺廟  
春月秋風空自閒鞦韆左界連商雒碧瓦朱欄露華薄  
經時掩戶庭草深永晝無人澗花落徘徊未下日將西  
遙望嵩陽煙景微鶴馭飄颻向何許林間空見白雲飛

烏栖曲二首

風透金鋪結綺錢  
穿簾入幌舞垂蓮  
可憐無人夜不曉  
起視西窓月華皎

星踈月明漏水長  
羅帷翠帳華燈光  
佳人起舞玉釵墮  
門外烏棲鴈南過

和王介甫明妃曲

胡雛上馬唱胡歌  
錦車已駕白橐駝  
明妃揮淚辭漢主  
漢主傷心知奈何  
宮門銅環雙獸面  
回首何時復來見  
自嗟不若住巫山  
布袖蒿簪嫁鄉縣  
萬里寒沙草木稀

居延塞外使人歸舊來相識更無物只有雲邊秋鴈飛  
愁坐泠泠調四絃曲終掩面向胡天侍兒不解漢家語  
指下哀聲猶可傳傳徧胡人到中土萬一佗年流樂府  
妾身生死知不歸妾意終期寤人主目前美醜良易知  
咫尺掖庭猶可欺君不見白頭蕭太傅被讒仰藥更無  
疑

憫獄誣

五刑象天有震耀上聖本以防姦邪法官由來少和泰

舉陶之面如削瓜沉於秦漢任酷吏死人籍籍如亂麻  
捶楚之求靡不得小者劓刑大滅家君不見古時牢獄  
地幾多冤骨埋黃沙

宮漏謠

宮漏清高處處聞六街寂寂夜將分南下河梁緬詰曲  
北瞻禁闕鬱繽紛黃金鎖閉斗城斜白玉樓通上帝家  
若木未光潛日月神仙不動積煙霞銅壺銀箭夜何長  
杳杳亭亭未遽央複道迴廊接西掖千門萬戶遙相當

宛轉徘徊不能駐復出宮城透宮樹宮樹烏飛月欲西  
燭光一道照沙隄龍騎聯翩排闥闔鳳帷岑寂對狻猊  
廣庭肅肅延冠帶劍佩崢嶸百神會施政發令四海春  
廟堂垂衣天寓泰

窮兔謠二首

鷗翅崩騰來九霄兔命迫窄無所逃秋毫就死忽背躍  
鷗拳不中還飛高安知韓盧復在後力屈但作嬰兒號  
少年只取一快樂誰念草根腥血毛

兔營三窟定何在棘間塹底高丘巔却行百步方躍入  
未免餘蹤留雪田少年何為無惻隱解鷹縱犬薰以煙  
人言兔狡非兔狡窘急偷生真可憐

張子厚先生哀辭

名載

先生負材氣弱冠遊窮邊麻衣揖鉅公決策期萬全謂  
言叛羌背坐可執而鞭意趣小參差萬金莫留連中年  
更折節六籍事精研義農訖周孔上下皆貫穿造次循  
繩墨儒行無少愆師道久廢闕模範幾無傳先生力振

起不絕尚聯綿教人學雖博要以禮為先庶幾百世後  
復覩三王前釋老比尤熾羣倫將蕩然先生論性命指  
示令知天聲光動京師名卿爭薦延寘之石渠閣豈徒  
修簡編丞相正自用立有榮枯權先生不可屈去之歸  
卧堅孤嫠聚滿室餬口耕無田欣欣如藜藿皆不思肥  
鮮近因詔書起尋取病告旋舊廬不能到丹旆風翩翩  
人生會歸盡但問愚與賢借令陽虎壽詎足驕顏淵況  
於朱紫貴飄忽如雲煙豈若有清名高出太白巔門人



俱經帶雪涕會松阡厚終信為美繼志仍須專讀經守  
舊學勿為利祿遷好禮效古人勿為時俗牽修內勿修  
外執中勿執偏當令洙泗風郁郁滿秦川先生儻有知  
無憾歸重泉

景福殿東廂詩

皇祐元年作

皇祐元年秋八月皇帝臨策賢良方正及武舉  
進士僕與范景仁受詔讎校策卷寓直於景福  
殿東廂凡三日得詩十三首編之左方

夜意

清夜四無譁深嚴上帝家星翻珠網白斗挂玉樓斜風  
靜虛成韻霜輕未作花還疑漢津客浩蕩寄流槎

即日

枌栝留深殿倉琅祕九門日長人對直風迥鷺高翻林  
有蕭疎意雲無片縷痕釣天真自到不獨暫飛魂

柏

落落抱高節秀出青雲端無言澗谷幽自致宮庭難芳

風製玉宇餘露分銅槃不使萬年木嘉名高歲寒

御溝

萬戶鬱相鉤枝分瑟瑟流縈紆通桂觀隱見帶龍樓碧  
映千林曙紅飄一葉秋寒波長不竭歲歲奉宸遊

賜酒

和氣盈金榼恩光湛玉觴應知北山羽猶怯上林霜醇  
味回秋色清都近醉鄉山茅霑雨露誓極寸心長

菊

瑣瑣南陽菊秋潭歲自開孤根擁紅葉落藥媚蒼苔正  
以參靈藥因之植紫臺願兼金掌露同入柏梁杯

賜果

南海荔枝來別館蒲萄成匪頒浹下陳捧拜同驩榮置  
黍敢先食臨槃多未名懷核待歸種復愁千歲生

賜書

上聖固天縱英藝皆絕倫時乘萬幾閒翰動如有神用  
之當豫遊不忘安四民匪頒及羣下絡繹來中宸毳毼

靈鳳翔鬱怒虬龍振清若四海秋熙如天下春愚臣土  
芥微亦受雨露均願推賜書意直以古義陳士本學先  
王所求誼與仁農當服稼穡昏作畎畝勤百工備用器  
不治刺繡文萬商遷有無不通珠翠珍四業旣交修坐  
令風化純人和衣食豐天應殊祥臻皇心正在此非以  
能高人

怪石

昔去江湖鄉來與松桂接圭角老龍脊鋒稜秋劒缺歷

亂枯苔點交橫敗莎葉會使成都人更取神著標

未開木芙蓉

木末采芙蓉騷人歌所無何言霜花艷不與水芝殊香  
苞麝臍結茂葉桐陰敷豈若龜巢類飄零老五湖

讀武士策

漢家求猛士雲集未央宮天外胡星淡山西將種空奇  
謀紛並進壯節凜生風八陣縱橫勢依然見目中

觀試騎射

閭闔風正清  
觚稜日初媚  
材雄集便殿  
玉座親臨視  
三河俠少兒  
初識天子貴  
天山汗血騮  
蹀躞金銀轡  
揚鞭秋雲高  
顧盼有餘銳  
縈回勢可觀  
磬控動如志  
毫釐應心目  
審固參身臂  
鳴絃電驚寸  
的冰瓦碎  
龍顏薄笑春  
喜色連傍侍  
旦為徒步人  
暮作彩纓使  
揚揚出九門  
親友生意氣  
須知天地德  
慎勿忘所自  
黠羌猶旅拒  
獫狁方繁熾  
求為忠義臣  
無負搜羅意

同范景仁寄修書諸同舍

烈火非不猛不耗百鍊金寒霜非不嚴不彫竹柏林小  
人勢利合傾覆無常心君子道德親白首猶視今諸君  
閨臺秀相得如璆琳離羣一昔期乃爾動悲吟古風久  
已衰交道日頽侵願名思友操播之清徽琴

和聶之美諷古

曲逆從漢祖出竒誰與讓一朝寄天下不及王陵戇  
海客久藏機鷗知人未知如何毫末利管鮑亦相欺

和之美二貧詩



君子尚仁義寶用為身資其人苟不賢富饒亦胡為所  
以回憲徒不厭糠與藜當時萬金產令名傳者誰之美  
初解褐為吏長河湄月得數斗祿僅足供饘糜謂言家  
無寶不必修藩籬囊衣不自暖乃為偷意窺穿墉入其  
室採取無纖遺從事借之帶同列乞其衣日高服未具  
不敢踰門畿蕭條四壁寒獨立空自嗤援毫引幅紙書  
作二貧詩上言運命遭溫飢無時期下嗟職事勞舊學  
日以隳乃知賢者心不獨憂寒飢墮坎雖益多志業終

無衰我實甚貧者視君猶白圭行年三十餘碌碌無佗  
竒庇身太學官旦夕唯鹽齏讀君二貧作我事借君詞  
君誠士林秀不免青衫卑滿腹豈無才抱蓄未有施不  
用固為小用之活蒸黎如君有此富豈必藏珠璣財貧  
非道貧已矣何嗟咨

送薯預苗與興宗

客從魏都來貽我山藷實散之膏土間春苗比如榔吾  
家庭戶狹樹藝苦其密危根遞扶戴怒牙猶拂鬱興言

念伊人好嗜與我一家蓄桐君書喜觀汜氏述雖為簪  
帶拘雅尚林樊逸分獻取其誠豈容羞薄物況聞知藥  
者餌此等苓朮願益君子年康直體無疾散誕得寬壤  
繁大宜無日蕭梢新蔓抽荖尊故叢失入冬霜霰嚴葉  
落培可出伸如猿臂長拳若能臚臚拾木爨銅鼎相期  
聚書室誰得與其徒谿茶與山栗

答昌言求薯預苗

冬實散肥壤春苗動新葉雅意非遺人野情聊自愜何

言好事者求訪來相疊會種十畝餘坐取詩盈篋

送冷金牋與興宗

蜀山瘦碧玉蜀土膏黃金寒谿漱其間演漾清且深工  
人剪穉麻擣之白石砧就溪漚為紙瑩若裁瓊琳風日  
常清和小無塵滓侵時逐賈舟來萬里巴江潯王城壓  
汴流英俊萃如林雄文溢箱篋爭買傾竒琛夫君乃冠  
冕辭氣高千尋十載為舉首於今猶陸沉嗟我蓄此紙  
才藻不足任願以寫君詩益為人所欽縞帶豈多物足

明同好心黃鐘聲如雷豈病無知音請以此為質佗年  
神所臨華軒策駟馬慎勿忘遺簪

和端式十題

春塘冰

春塘含薄冰淅瀝隱隈曲晴日射寒芒柔風折哀玉草  
樹曾未知波光已先綠

煙際鐘

蒼茫返照收幕歷寒煙起前山黯同色不辨峯巒美獨

有遠來鐘悠揚翠微裏

汀洲蘋

秋江逸一  
字澹蕩波急枝難定參差碧葉繁皎潔寒花靜幽

人吟不歸獨立汀洲暝

漁洲火

漁翁繫葉舟遠映楓林宿手携雙白魚呼兒爨山竹深  
夜寂無人明滅寒江曲

寒溪石

穹石正嶄岩寒流更清急霜飛敗葉擁波濺蒼苔濕谿  
僧勿劇來沙鶴方孤立

幽谷泉

深谷窅無底空聞泉水哀時因秋日照微見碧縈回谷  
裏非人境胡麻何處來

秋原菊

高原向搖落叢菊始滋榮草際浮金碧照人雙目明何  
須天生理玉斲泛餘英

垂崖鞭

山竹引春根垂透蒼崖底  
綢直老龍鬚佶屈修蛇尾  
支郎雖畜馬不忍裁為箠

古木陰

古木夏陰薄蕭蕭蠹葉微  
豈無綠樹濃愛此風煙姿  
高僧此休息肩倚瘦筇枝

天外峯

飛鳥去不息長空黯何極  
踈峯帶夕暉點綴秋天碧  
禪



觀坐超然相望兩沈寂

和聶之美雜澤官舍詩七首

西齋

明府學旣優所聞今得施四境已澄清還以書自怡西齋幾黃卷治原俱在茲

題廳壁

百里有民社古為子男國苟有愛物心穉老皆蒙德為身不為人鄙哉陶彭澤

縣樓

孤樓雖不高足以瞰四遠  
餉婦陌頭歸田夫桑蔭飯  
吏省追胥勿令農事晚

葦

索索夕風澆灑灑朝露裊  
啁雀裊寒枝宿螢依敗葉  
然秋興長坐與江潮接

柳

驛道苦車馬田廬悲斧斤  
誰栽官舍前老朽完天真  
所

願明府心庇樹如庇人

向城路

村路煙欲暝行人殊未稀借問往來者營營皆有為乃  
知市朝客趣務良可悲

懷翠亭

高齋對秋山平望殊不遠雖違獨往心蒼蒼長在眼可  
嗟都邑遊終日紅塵滿

趙然臺詩寄子瞻學士

使君仁智心濟以忠義膽嬰兒手自撫猛虎鬚可攬出  
牧為龔黃廷議乃陵黠萬鍾何所加甌石何所減用此  
始優游當官免阿諂鄉時守高密民安吏手斂投閒為  
小臺節物得周覽容膝常有餘縱目皆不掩山川遠布  
張花卉近綴點筵賓般核旅燕居兵衛儼比之在陋巷  
為樂亦何歎可笑夸者愚中天猶慘慘

今古路行

出門道路多縱橫不我測我今欲遠行須問曾行客徐

徐逢路人咨問青松側客曰君何往答曰遊京邑客乃  
指要路而言行有益古路雖大道不如今路直但行今  
人路猶如假羽翼彼客別我去獨自踟躕立為見今古  
路無乃須差忒今路足輪蹄古路饒荆棘欲行今人路  
恐背古人迹擬行古人路今人笑迂僻又擬不出門奈  
有飢寒逼哀哀於此情悠悠蒼天色不避今人嫌路須  
行古陌古陌雖然遠且保無厥失勉哉自勉哉前古難  
知識不復見楊朱萬古凝愁魄

憶同尋上陽故宮路

上陽門外雲連草車馬遙遙往來道昔王遊豫幾何年  
今人豈識當時好明珠翠羽已成塵道上行人幾番老  
當時秋天落宮槐今此婆婆皆合抱

秋意呈鄰幾冲卿

新涼入閭巷舊暑何人掃筠籠賣紅蓮莎堦墜丹棗蕉  
衫日以踈紈扇安能好蟬悲西風樹燕亂斜陽草此意  
屬淵明籬邊幾樽倒

大邑回書

謝家集

三十三

傳家集卷五



欽定四庫全書

傳家集卷六

宋 司馬光 撰

律詩一

御製後苑賞花釣魚奉聖旨次韻

馭娑蜚廉次第開  
鳴鞘傳蹕自天來  
雲隨綵仗低臨幄  
柳壓金隄翠入杯  
檻倚柔風絲縹渺  
花翻麗日影徘徊  
上林春色長如舊  
玉輦嬉遊歲歲陪

奉和御製龍圖等閣觀三聖御書

嘉祐七年十一月二十七日

上日

積厚丕丕業重光郁郁文寶書垂列宿玉宇切浮雲散  
帙鳴鑿駐充庭雜珮分願移天縱藝似續聖功勤

資善堂宴餞應詔

士論歸清德皇心重老成陳謨侍經席得謝解塵纓坐  
密金章並行徐玉醴清都門昔供帳疏傳未為榮

賞花釣魚二首

飛廉通上苑鳩鵲帶天淵樹色含春霧波光靜曉烟香

飄仙仗外花舞御卮前籊籊文竿裊籊素鮪鮮誤陪  
金馬籍愧奉栢梁篇願獻南山壽宸遊侍億年

日麗芙蓉闕春榮太液波苑門鳴玉集輦路翠華過芳  
樹周阿密嘉魚在渚多浮英入樽筭頌首出蒲荷人樂  
熙熙德臣賡旦旦歌萬生同鼓舞相與醉天和

邇英閣讀畢後漢書蒙恩賜御筵

赤伏開興運昆陽定壯圖官儀還舊物郊兆建新都杲  
日羣陰破油雲萬類蘇鑿輿陟喬嶽璽綬撫匈奴厚祿

優諸將嘉猷訪大儒重明紹堂構奕葉奉規摹叔世條  
綱紊遺風節義扶袁安空隕涕揚震卒蒙辜佞指車前  
鹿人瞻屋上烏炎精盡河渚黃眚兆當塗青簡傳良直  
金華侍燕娛興衰炳轍迹淑慝粲龜符赫赫天光照  
孳睿思紆方齊建武治不啻永平俱化盛文明正恩隆  
飲食需晞陽慙杞棘濡味愧鷓鴣帝力生成大臣功報  
效無先民誠可監願不忘斯須

奉和江鄰幾文德殿觀文武百官等上尊號十

五韻

六月七日

舜禹曾何與義農實強名含靈徒叶贊造物始無情閻  
闔非煙澹觚稜曉氣清葳蕤大衢隘殷麟外朝盈鮮旭  
分衣繪薰風拂佩瓊華顛方內集殊俗海隅傾啓戟金  
閨奧囊書赭案橫敷言齊列位稽首從羣卿不報乾坤  
施難圖日月明仁心由性得治體與時行金石皆中款  
丹青豈外榮功歸元首重澤及草茅輕業業冲虛意區  
區愛戴誠何為猶讓德不以慰懷生退復歌天保期於

采頌聲

和宋次道大慶殿上元迎駕

鳳律年華到尚新九重氣象已成春  
曉雲低拂羽林仗宿雨先清紫陌塵  
玉殿鳴鞘傳警蹕彤庭委珮集簪紳  
闕前無復魚龍戲自有驩謠億萬人

寒食御筵口號二首

雨意沉沉潑火餘  
夔龍盛集退朝初  
酒殺絡繹來丹禁  
冠劍參差下玉除  
紫鳳歸飛雲爛漫  
黃鸝新轉柳扶疎

麥禾滿野邊烽息佳節何妨賦樂胥

聖主褒優鼎軸臣金觴玉醴照青春萬家煙火朝來靜  
九陌風光雨後新高鷺翻飛驚紫綬餘光點綴託朱輪  
問牛因得觀民俗不獨嬉遊惜令辰

春祠致齋寄呈范景仁宋次道

比日聚官含笑言曾未厭暫成揮手別各有侍祠嚴晴  
景朝朝麗春容物物添解齋當共醉莫遣此期淹

和王道粹春寒趨館馬上口占

殘臘尚要春清寒更著人雪華猶惜別物意倍添新雲  
壓宮城重風調玉漏勻行遊宜結轡九陌未多塵

同宋次道元日宿尚書省聽戒誓寄常州邵不

疑

去年是日次道  
同不疑齋直

椒花獻歲新瑄玉侍祠頻此夕同華省非才愧後塵江  
風迎茜旆沙雨待朱輪不比齋宮冷端居棄擲春

正月三日與廣淵同出南薰門分趨齋宮途中

成



並轡出都門  
蔥龍日欲昕  
野寒餘宿雪  
樹閣濕春雲  
未望郊宮近  
先愁馬首分  
一朝猶戀戀  
可復久離羣

二月二日太常致齋晨起呈范景仁宋次道二  
同舍

官舍春蕭瑟  
朝來尚薄寒  
人雖繁陌上  
塵不近門端  
已

負踏青約

同舍先  
有是約

仍無舉白歡

從次道求酒  
不獲故云

憑君御溝

上試折柳條看

和王道粹垂拱早朝王范二直閣班列在前戲

成小詩

霽日扶霜仗，祥煙覆曉班。  
帝居回北斗，天闕竦南山。  
紫殿鴻鸞肅，金門虎豹環。  
蓬萊兩仙伯，迥立白雲間。

和宋子才郎中孟秋省直

夜久殘暑盡，好風來滿襟。  
牀空唯置枕，冠小不施簪。  
竹影亂涼月，林梢轉曉參。  
人心有喧寂，何必卧雲岑。

八月五日夜省直

大火已西落，溫風猶襲人。  
留連惜紈扇，散誕脫紗巾。  
蟾

影夜色淺蛩聲秋意新圖書足自適何物更關身

八月七日夜省直苦雨三首

夜色槐陰重雨聲官舍寒野農安敢問環堵未能完  
盡日流雲度何時大塊乾正愁開霽晚霜霧滿紅欄

悵望中秋月於今已上弦明生圭樣小影露桂花偏幽  
思邈難致浮雲去不還何當出陰翳清徹照中天

菊蘂如排粟青青見葉心未嘗窺白日何以散黃金歌  
側踈籬短綿延蔓草深寒蛩爾何與終夕亦悲吟

次韻和江鄰幾九月五日省直

羣騶布路散瘦馬解鞵迴雨闌蟲聲樂秋深菊意催圖  
書紛自適僚友邈誰陪何以消寒夜殘醪不滿杯

和宋次道奉慈齋宮見寄

去住邈如霄與塵依依欲別更相親雖知洛邑饒英俊  
莫忘齋廬並直人

次韻和王勝之十二月十五日朝退馬上作

瓦溝微白雪光清闕角初紅海日騰塵息長街千騎入

鞘鳴深殿六龍昇雲巖有客空回首圭華何人尚曲肱  
自笑鯁生章綬縛不容逃去正如罾

又和雪

四簷冰管未全晞一夕陰風雪又飛  
客卧牛衣憂死別人留玉塞望生歸  
公車歲晚憐東郭遼海雲深失令威  
頗憶當年映書否物華如舊鬢毛非

和王粹道雪夜直宿

天祿凝嚴近紫臺書帙夜對雪華開  
層樓直倚寒空出

清漏還從深殿來，薄夢不成冰柱折。  
曉光先到玉花催，兔園終是諸侯事。  
虛費相如能賦才。

館宿遇雨懷諸同舍

佳雨濯煩暑，條然生曉涼。  
森沉殿瓦碧，幕歷井苔蒼。  
院靜杉篁秀，人閒鐘鼓長。  
憑誰同把酒，清興甯相望。

寒食南宮夜飲

積旬留省署，容易度春華。  
芳草踏青晚，長楸行樂賒。  
雲疎時送雨，風細暗飛花。  
直有黃金百，無因過酒家。

和范景仁夜讀試卷

案前官燭墮花頻滿目高文妙入神勇氣先登勢無敵  
巧心後發語尤新好賢何啻三薰貴求寶方知百汰真  
愚魯自非憑驥髮崑山千里到無因

代叔禮作使北詩

人主愛民物心無彼此情約歡同一國蒙福徧羣生玉  
帛遙相望風波寂不驚熙熙南北海所至盡升平

又擊毬

肅奉乘軺命仍陪戲馬遊  
朋分初迫出勢合復相收  
顧盼華星激縈回紫電流  
良因重嘉好禮接使臣優

同宋次道陪讌瓊林

冠益連翩數里塵  
帝家全借上林春  
鷓行不動煙霞秀  
龍角正高雷雨新  
喜氣晴曛宮樹綠  
飛花醉墮玉卮頻  
蒲萄盧橘應相識  
半是當年舉酒人

是日在席  
同年七人

寄題興州晁都官仲約東沼沼上有唐鄭都官

詩刻石



名郎遊勝地，心跡繼風流。昔為題詩著，今因好事修。四山相照映，五馬屢淹留。想見波光淨，依然一片秋。

鄭詩云微

底千峯影無風一片秋

### 和趙子輿龍州吏隱堂

四望逶迤萬疊山，微通雲棧落塵寰。誰知吏道自可隱，未必仙家有此閒。酒熟何人能共醉，詩成無事復相關。浮生適意即為樂，安用腰金鼎鼎間。

### 寄題錢君倚明州重修衆樂亭

公輔



橫橋通廢島華宇出荒榛風日逢知己湖山得主人使  
君如獨樂衆庶必深顰何以知家給笙歌滿水濱

題楊中正供奉洗心堂

崇勳之孫

閱閱盛山西朱門颺戟衣雅知名教樂深笑宴遊非一  
室琴書隘三年園圃稀異時論事業肯復讓輕肥

寄題李舍人<sup>偉</sup>蒲中新齋

隴上家聲勇氣殊邊庭卧鼓欲安居非同王翦私求宅  
更似甘寧晚好書劔倚寒窓風浙瀝門無雜客柳蕭疎

蒲州風土平生愛為問旁鄰地有餘

寄題常州東山亭二首

謝傅英聲高可攀結茅積土想東山常憂勝槩一朝盡  
豈信風流千古還塵尾蒲葵供永日酒樽碁局奉歡顏  
賢侯心迹遙相望不使蘭陵風月閒

閎闕崔嵬動四方入門鸞鶴自成行青綈舊已臨佳郡  
墨客新歸耀故鄉醉舞幾應摧屐齒對碁正欲賭香囊  
階庭玉樹寒相照更使東山逸氣長

王金吾北園

丞相後園天籟鄰年年分借上林春目前但識禽魚樂  
門外何妨車馬塵花蘊祇疑名品盡圖書方驗古今貧  
將軍朝下無餘事端為風煙作主人

寄題傅欽之濟源別業

縣郭遙相望脩篁百畝餘林間清濟水門外太行車道  
勝隨宜足身閒與世疎何時容命駕采蕨釣肥魚

遊李衛公平泉莊

相國已何在空山餘故林  
鄉時堪炙手今日但傷心  
陵谷尚未改門闌不可尋  
誰知荊棘地鶴蓋舊成陰

寄題李水部庠澹水別業

茅茨臨素澹沃野帶長林  
日永一堂靜草生三逕深  
消憂何用酒為樂不須琴  
擾擾市朝客無人知此心

寄題濟源李少卿章園亭

縣僻人事少土肥風物殊  
杖刊靈壽木輪裹浪梁蒲  
竹不減淇水花仍似洛都  
主公眉雪白遊覽未嘗扶

寄題宇文中允之邵所居

孤宦行直道栖栖良可悲誰能拂衣去不待掛冠期  
經史乃吾友雲山為已知世間青紫貴盡付兩佳兒

戲書宋子才止足堂

舉世戀榮祿夜行無乃勞獨君年未至止足一何高  
矮製烏紗帽寬裁白氎袍華棖坐終日閒按紫檀槽

寄題張著作中理

善頌堂

嘉州公裕  
學士之父

玉壘老先生逍遙樂太平門闌百客盛冠蓋一鄉榮國

族招邀近堂皇指顧成江山對平遠圖史散縱橫止水  
中心適秋毫物外輕鯉庭新露冕閭巷不須驚

寄題刁景純藏春塢

景純致政歸京口治其所居命曰藏春塢前有一崗

皆松林命

曰萬松嶺

藏春在何許鬱鬱萬松林永日門闌靜東風花木深主  
公今素髮野服遂初心時與鄉人醉高歌散百金

遊瀍上劉氏園

日暖孤臺迥露濃幽徑微茅齋舉白飲沙溆踏青歸照

水清滿眼穿林香濕衣莫言春尚淺已有杏花飛

題致仕李太傅園亭

漢家飛將種氣槩耿清秋解去金貂貴來從洛社遊清  
商擁高宴華館帶長流可笑班超老崎嶇萬里侯

太行

象帝胚渾散愚公轍跡開橫行四極外蟠據九河隈第  
鬱天關近崢嶸地軸回陽崖明草樹陰壑轉風雷波沓  
羣峰涌雲奔峭壁來猿崑垂磊落龍窟鬪喧吼噴雨驚



湍灑跳壘巨石頽平途憂履折跬步戒輪摧覆頂千春  
雪緣潭萬古苔谷盤容國士髓裂餌仙才晉市飛樵札  
燕郊落燒煤碁圖分冀野蟻壤認叢臺在昔王塗塞嘗  
聞霸略恢嚴關陰伏甲間道夜銜枚挾詐揮金斗貪功  
襲墨縑戰場空爍火京觀悉蒿萊險易曾何變興亡只  
可哀隆平方恃德襟帶自崔嵬

漁父

楚岸橘花香扁舟泛渺茫短蓑衝密雨素髮淨秋霜煙

外鳴根遠波間擲線長無人識名姓擊楫入滄浪

早春

璿霄轉斗車春意逼梅花熟寐侵街鼓閒情到酒家晴  
陽浮地末寒色斂天涯歸鴈空餘迹朝來印浦沙

山中早春

山木欣欣意春光次第催歌巾望歸鴈伏檻聽新雷巖  
靜聞冰折巢空喜鷺來澗花從寂寞亦向草堂開

贈學仙者

微逕透重巒茅堂竹葉冠方瞳映骨靜秀氣逼人寒夜  
火裝丹竈晴霜黓石壇不須驚淺俗輕舉入雲端

入塞

萬騎入榆關舉蘭苦戰還摧鋒佩刀缺蹋血馬蹄殷鏡  
吹來風外牛羊出霧間須知沙塞惡壯士變衰顏

田家

未塞豪人奪何言公賦收皇心雖惻隱蓬戶或焦愁為  
吏空多祿無人能此憂知君坐公府佗日富民侯

和人葦花

葭莩迷河曲高秋一番榮齊紈張野白楚練照川明不  
夜月長皎踰時雪未晴萬仙霓帔合千畝玉苗生漠漠  
波瀾偃茫茫沙碛平際空鹽海竭垂地塞雲橫日暖鷗  
無色風高鶴有聲逢君得嘲賦豈愧束薪并

華清宮

新豐雞犬稀薊北馬秋肥金殿翠華去玉階紅葉飛荒  
林上路廢溫谷舊流微嗟此非人事何須問是非

虎牢關

天險限西東難知造化功  
路邀三晉會勢壓兩河雄  
餘雪霑枯草驚飈卷斷蓬  
徒觀爭戰處今古索然空

梧桐

紫極宮庭闊扶踈四五栽  
初聞一葉落知是九秋來  
實滿風前地根添雨後苔  
羣仙儻來會靈鳳必徘徊

秋日登觀信亭

西風連夜雨草樹已蕭條  
宿霤稍零落寒山更寂寥  
林

紅猶帶日岸白欲生潮  
新鴈來何處離離天際遙

湖上村家

萬頃寒煙外茅茨枕碧流  
楓林巢乳鶴沙渚亂鳴鷗  
漠菰蒲晚蒼蒼蘆荻秋  
欲過南浦去籬下出漁舟

雙竹

草木類同而種殊者竹為多  
杭州廣巖寺有雙竹  
相比而生舉林皆然其尤異者  
生枯樹腹中自其頂出  
森然駢竦樹如龍蛇相縈  
矯首研然予見而賦之

雙幹標枯腹青青凡幾霜龍騰雙角直鯨噴兩鬚長但  
欲尋支遁安能問辟疆屢來非別意未與此君忘

南湖二首

宋都南野水花柳媚名園鳥起沙留迹魚驚浪結痕朱  
橋通別島白路出荒村城邑雖云邇常無車馬喧

海鴈長橋北乘閒日日來遊魚自應樂宿鳥不相猜弱  
柳週遭合芳花次第開梁王昔遊集後乘列鄒枚

西谿公讌二首

五馬非從樂西城念勸功翠帷低映水紅旆不勝風葉  
脫青山靜雲歸碧落空淹留盡佳興新月漸朦朧

謝守愛山水軍城況不賒魚驚避落葉鳥倦立浮查古  
柏依岡遠垂楊帶岸斜秋風吹急管一曲度荷花

西湖

佳麗三吳國湖光蕩日華魚驚動蘋葉驚喜掠楊花雲  
過山腰黑風驅雨脚斜煙波遙盡處髣髴見漁家

夏日西齋書事



榴花映葉未全開  
槐影沉沉雨勢來  
小院地偏人不到  
滿庭鳥迹印蒼苔

過故洛陽城二首

四合連山繚繞青  
三川滉漾素波明  
春風不識興亡意  
草色年年滿故城

煙愁雨嘯奈華生  
宮闕簷葉舊帝京  
若問古今興廢事  
請君只看洛陽城

初春登興國寺塔

雨過風清露氣勻  
林花變色柳條新  
為君作意登高處  
試望皇州表裏春

和李殿丞倉中對菊三首

高士寄朝市  
迥然心迹殊  
秋風太倉裏  
黃菊滿庭隅  
陶令成詩後  
王公送酒無  
遙知厭俗事  
未免強躊蹰

文案漸消散  
倉閒吏已稀  
庭空數蝶下  
夜靜一螢飛  
愛賞忽成句  
淹留時忘歸  
高情雖不繫  
遇此獨依依

涼風正蕭瑟  
好月復徘徊  
幽興眇不盡  
芳樽時一開  
餘

英蓋紅葉墜露濕蒼苔從此東籬下應忘歸去來

執酒

執酒勸君君盡之今朝取醉不當疑好風好景心無事  
閒利閒名何足知

河橋春別

河橋春盡送君歸又惜無歡度此時亂花滿眼遮人望  
不見行塵空酒旗

答陳進士謂之憶江東舊遊見贈

客路今東去亭皋木葉飛居然不堪恨況與賞心違顧  
渚煙波闊長洲草樹微江邊好春色行望錦標歸

又贈謂之

文藻兼名理三吳第一賢鄉心幾千里飛鴈滿秋天  
籬下多新菊淵明歸思長主人方愛客未得傲羲皇  
君念東歸日應須畫繡榮當令故闕吏還識棄繻生

重九日憶菊

節物都何晚佳辰容易過黃花不足念當奈酒盃何

客思

客思倦漂泊居然感物華  
關頭望紅葉馬上見黃花  
薄宦終無定閒愁詎有涯  
今朝書至否幾夕夢還家

前年春與楚正叔同遊陟屺寺  
今茲已復周歲  
窅然思之

陟屺寺南山曾陪半日閒  
春來夢攜手宛在白雲間  
曉霽

夢覺繁聲絕林光透隙來  
開門驚鳥鳥餘滴墮蒼苔

觀江上人壁許道寧畫寒林

昔曾驅瘦馬衝雪過滎陽不悟當時景蕭然在此堂

自都往餘杭懷聶之美

閣上新文卷欲逢知己開相思不能已歆枕夢君來

夢與之美為寒食遊

寒食無佳賞芳菲半已空夜來逢勝友末至負東風

別聶之美

客宦常漂泊離懷徒自勞貧無衣換酒空有涕霑袍木

葉寒猶在江湖暮更豪行舟遠不見賴有片帆高

松江

吳山黯黯江水清欲雨未雨傷交情扁舟蕩漾泊何處  
紅蓼白蘋相映生

秋風索索連江起暮過煙波十餘里長蘆瘦竹映漁家  
燈火渺茫寒照水

潮水二首

平江欲上潮古木自蕭蕭兩岸饒葭葦寒波浸寂寥

淋淋出海門百里雪花噴坐看東歸去平沙空有痕

旅宿睢陽南湖

梁王棄宮館時世古今違猶有南湖水春來鴈鴛飛樓  
臺沈倒影林薄挂餘暉豪侈終何在行人得暫依

聞龔伯建下第

文章真長物堪歎又遺賢利器空埋土靈光久照天趙  
錐猶未出荆璧會須傳道在雖窮困知君不慨然

題陳秀才鳳園林



劇談驚滿座音貌獨琅然可惜酈生老誰知蘇季賢青  
囊世外藥碧幕醉中天不佩黃金印都緣負郭田

九日登麻蘭坂

客路逢佳節無歡更益愁前山造雲日登陟不因遊

遊延安宿馬太博東館

字承之

高館寂無譁安閒勝在家暮煙凝塞上堠火落天涯坐  
久筆生凍夜闌燈作花主人意未盡歸路不為賒

送何濟川為龐公使慶陽席上探得冬字

陟

幕府遙三舍傳車乘一封忠深輕遠道醉後失嚴冬  
水猶飛檄蘆關未滅烽賢侯雖喜士難得久從容

延安道中作

羈旅兼邊思川原蹠血新煙雲長帶雨草樹不知春  
細水淘沙骨驚颺轉路塵今朝見烽火白首太平人

廊州懷聶之美

何言内外家憂患兩如麻別淚行三歲思心各一涯  
海邊昏霧雨塞外慘風沙安得雲飛術乘空去不遐

和張推官同年師奠春陰無緒偶成

澹泊輕雲寒不收  
未成春雨只添愁  
風煙寂寞幾何限  
盡入憑高一寸眸

薄寒未去臘纔過  
春色先知在綠波  
不是宿雲能作思  
大都王粲自情多

春曉

鐘漏初傳曉  
滿窓風雨寒  
東岡行可種  
歌枕不成安

鷺鷥

清閒自合無憂累  
白髮何因更颯然  
遙望孤飛下秋水  
雪花一片落晴天

待詔二首

京洛風塵裏相逢眼盡青  
故人多密近誰誦四隅銘  
待詔久公車囊裝半已虛  
雄文雖雅麗未得似相如

觀僧室畫山水

畫精禪室冷方暑  
久徘徊不盡林端雪  
長青石上苔  
心閒對巖岫目淨失塵埃  
坐久清風至疑從翠澗來

贈外兄吳之才 挺

何須親始重友分固非疎況復羈孤極同經憂患餘晚  
成應大器先得類凡魚遊衍陪嚴忌聲華誦子虛蒲輪  
詔枚叔駟馬寵相如莫忘西都日寒牕夜讀書

九日懷聶之美

時余在河南  
聶在陳州

錢唐江裏扁舟上別後籬花幾度黃憂患縈心何繚繞  
風光滿目盡淒涼誰同鑿落盃中酒獨繫茱萸肘後囊  
可復無書道情素雲間空有鴈南翔

太室橫山蔽十里相思空復上高臺  
瓮頭白酒行當熟籬下黃花稍復開  
陶令不無同醉興孟君況有解嘲才  
欲憑西北高風勢飛度鞦韆勸一盃

飲吳之才家

京洛相逢設主人富家鼎食不如貧  
解衣換酒同為樂知是交情百倍親

晚秋洛中思歸東園

不利不名空去國鴈飛葉落未歸來  
秋風肯待主人至

籬下黃花隨意開

普明寺荷塘上置酒

菡萏飄零水寂寥  
敗荷踈柳共蕭條  
煙斜雨細愁無限  
醇酒千分不易消

送孟仲習宜君令

朝

合抱生毫末無為厭  
小官政成心更逸  
道勝意常寬  
野迥山形秀  
雲踈雪意閑  
離盃如不盡  
何用禦祁寒

雪齋登普賢閣

積雪明朝日山河坐可分  
嶺巖初解凍片段未歸雲  
閣望窮人境高尋俯鴈羣  
開門枝鳥散玉絮墮紛紛

和陳殿丞芍藥

化工餘巧惜春殘更發濃芳  
繼牡丹檀點藏心殷勝纈  
異香迎鼻酷如蘭瓊樓窈窕  
仙家宅雲葉低垂醉裏冠

纈子樓子兒子醉  
西施皆芍藥名品

自有殊功存藥錄不當獨取鄭詩看

到任明年旨罷官有作

恬然如一夢分竹守長安  
去日冰猶壯歸時花未闌  
風



光經目少惠愛及民難可惜終南色臨行子細看

和景文議交絕句

邇來友義漸隨頽直諒多聞貴不回勢利相交何足道  
已知餘耳愧陳雷



傅家集卷六